

Kemunculan Tun M di konvensyen Amanah isyarat positif untuk Pakatan Harapan
Astro Awani
Dis 10, 2016

KUALA LUMPUR: Selepas membuat kejutan hadir ke persidangan DAP minggu lepas, bekas Perdana Menteri, Tun Dr Mahathir Mohamad muncul pula di konvensyen pertama Parti Amanah Negara (Amanah) hari ini.

Kehadiran Mahathir di konvensyen Amanah hari ini dan persidangan DAP baru-baru ini seolah-olah memberi isyarat Parti Peribumi Bersatu Malaysia (PPBM) akan menyertai Pakatan Harapan menjelang pertemuan pemimpin gabungan parti pembangkang 13 Disember ini.

Sebelum ini Presiden PPBM, Tan Sri Muhyiddin Yassin memaklumkan partinya akan membuat keputusan sama ada akan menyertai Pakatan Harapan atau tidak hanya akan diketahui selepas Mesyuarat Majlis Pimpinan Tertinggi PPBM yang dijadual pada 13 Disember nanti.

Selain Mahathir, Ketua Parlimen DAP Lim Kit Siang dan Naib Presiden PKR Nurul Izzah Anwar juga hadir dan duduk di atas pentas bersama pemimpin-pemimpin utama Amanah.

Turut hadir Tun Dr Siti Hasmah Mohd Ali, Pengerusi Bersih 2,0 Maria Chin Abdullah, wakil dari Parti Sosialis Rakyat Malaysia yang juga bekas Ahli Dewan Undangan Negeri (Adun) Kota Damansara Dr Mohd Nasir Hashim dan Hishamuddin Rais.

Tag: [mahathir mohamad](#), [ppbm](#), [amanah](#), [pakatan rakyat](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-politik/kemunculan-tun-m-di-konvensyen-amanah-isyarat-positif-untuk-pakatan-harapan-125182>